

**Zeitschrift:** Nebelspalter : das Humor- und Satire-Magazin

**Band:** 83 (1957)

**Heft:** 48

**Illustration:** Parade anno 1960

**Autor:** Behrendt, Fritz

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation


L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 10.08.2025

**ETH-Bibliothek Zürich, E-Periodica, <https://www.e-periodica.ch>**



Parade anno 1960

### Vercheert schtatt lätz

s isch gwüs bald vierzig Joor här, as mer dr Großvatter das Gschichtli verzellt het, und doch chunnts mer all no glunge vor, wenn i amme wider dra dängg. Dasch eso gsi: My Großvatter isch vor bald hundert Joor uf dr Walz gsi, er isch wytt im Usland ummenand cho. Und do isch er emmel au in e chlyne Schtedtli im Würtebärgischen agcheert. Er isch «abrennt» gsi, «dr Droht isch em usgange», wie men in dr Gselle-schprooch gseit het – eifach, er het ke rote Santim mee im Sagg gha.

Denn het er e Feeler gmacht: Anschatt as er sich uf d Polizei isch go mälde, wos em zässes gee hätten und won er hät chönne pfusee, isch er in e Beggeladen yne go fächte. Es het drum so amächerligi, früschi Weggli im Fänschter gha. Er het aber nit gachtet, as zum Beggeladen au no ne Pintli ghört het. Erscht won er im Laden in schoot und grüsli afot joomere, wien er Hunger heig, ghört er us dr Wirtsschtube näbezue e Lachen und e Gigele. Und zmol leit em öbber e schweri Hand uf d Achsle und e tiefi Sichtimm seit: «Schwoizer, du bischt verhaftet, du weischt, daß s Bettlen obrichkeitlich verbotten isch. Im Namen des Gesetzes!» Wo euse Schwiizergsell ummeluegt, schtoot en Uniformierte hindrem mit eme grüüslige Schnauz im Gsicht und mit ere glänzige Piggelhuuben uf em Chopf. Was

het dä Handwärgsbursch anders welle machen, er het däm Polizediener müesse folge; er isch e paar Hüüser näbedra in e Chäller ygschpeert worde.


Aber euse Schwiizer het d Augen und d Ohren off gha. Chuum isch dr Riegel vom Cheefi zue gsi, het er zum Chällerfänschterli us gsee und ghört, wie d Lütt glachen und d Chöpf zämmegschteggt hei. Er hets bald dusse gha: Me het Schindlueder trybe mit em; dä won en verhaftet het, isch gar ke Poli-

zischt gsi, dä het vom ene Theater oder vom ene Feschzug här (wo am Tag vorhär gsi isch) no sy Uniform agha und het jetzt däm junge Schwiizer wellen e Schtreich schpiele ....

Am andre Morge het me dä Gsell (das wer also my Großvatter gsi) früe wellen uselo. Aber jetzt het dä afo ubbegääre. Er het d Polizei verlangt (die richtigi), het gseit, er sig vo eim ygschpeert worde, wo d Uniform und d Polizeigwalt mißbruucht heig. Wo das no nütt battet het, het er ne gseit, no giengs en andre Wäg: E Cousin vo sym Großunggle sig Gschwischtertichind zum e Bundesrot in dr Schwiiz; dä Bundesrot wärdi denn irem Großherzog oder König, wo si do heige, scho s Mösch putzen und em säge, wo dr Bartli dr Moscht tüeg hole ...

Potz, das het ygschlage! Jetz hets dä mit em Schnauz, wo geschartert no d Uniform treit het wie ne Pfau, mit dr Angscht z tue übercho. Aber au im Pfluttebegg und Wirt hets afo dötterle. Was hei si gmacht: Dr Begg het im Schwiizergsell dr ganz Berliner (Felleisen) mit Frässware vollgschtopft, und dä mit me Schnauz het em fünf Margg in d Hand druggt und het bättlet, er sell ums Gottswille däm Bundesrot nüt säge .... So ischs: E Hampfle Würtebärger hei ne Schwiizergsell welle für e Naare ha. Und zum Schluss hei die glyche Helle vor Angscht fascht in d Hose gmacht.

KL



«Gegensätze ziehen sich an!»